



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 8



Congress-i tekaraba nung opposition party tem ayongtsüla: Nitish Kumar



WPL 2023: Smriti Mandhana lenisüba nung RCB asayatsü

VOL. XX NO. 128 (ADOK 128) DIMAPUR AMUNGNÜ (SUNDAY) TSÜKLAI (FEBRUARY) 19, 2023 ₹ 5.00

Indisen nung lendong atalok

Dimapur, Feb.18 (TYO) : Tang Nagaland state general election agitsü aliba dak sendakba nung Honibar aonung Dimapur nung Indisen yimtak NDPP candidate ki anasa long agi aonba aser injang khatokba lendong atalokogo.

Iba lendong atalokba indang Indisen nung lanur lenir kati ashidang, honibar aonung 8:30 ako shi nung LJP telok ka gari pongo trok ka nung mener NDPP candidate ki anasa bottle tazüing

mereplokja ayimtena Indisen yim süia aoba agi jashir, parnok meyipa arudang parnok soiter asüngdangtep saka parnoki o mashi jembir taoi injang yok, iba jagi onoki jashir long agi ona arishi ta ashi.

Iba osang ataloker police-tem den asüngdangtep dang, onoki lendong atalokba indang bushisüngdang tepdagi ta ashi. Iba osang agütsü tashi nung candidate-tem denbo mejembitet.

Nagaland nung sencrore 43 tema puogo

Dimapur, February 18, 2023 (TYO): Nagaland Legislative Assembly 2023 indang General Election agitsü sangdongba sülen nungi February 17, 2023 tashi nung Central aser State Enforcement Agencies-i Rs. 43,84,68,620 puogo, ta Media Cell, CEO Office, Nagaland-i metetdaksü.

1. Cash	=	Rs. 4,06,44,495 /-
2. IMLF (71334.824 litres)	=	Rs. 4,56,98,290 /-
3. Drugs/Narcotics	=	Rs. 31,30,44,530 /-
4. Freebies/other items	=	Rs. 3,90,79,640 /-
5. Precious Metal (Silver-0.02332 Kgs)	=	Rs. 1,665 /-

Tanü National Capital Region nungi Khristantemi lungkak aiter

Dimapur, February 18, 2023 (TYO): India kübok tesem aika nung Khristantem anema inyaksangshiba atema National Capital Region (NCR) nung aliba Khristan tamangertemi February 19, 2023 nü Jantar Mantar nung timi lungkak aitba sentong ka ayongzükogo.

Khristantem dak tashiyim inyakba state temji Uttar Pradesh, Chhattisgarh, Madhya Pradesh, Uttarakhand, Karnataka aser Jharkhand state tem lir, ta Delhi NCR nung tamangertemi ashi.

Asüng lungkak aitba sentong agiba sülen India President Draupadi Murmu, Prime Minister Narendra Modi, Parliament nung Speaker ana aser Lok Sabha nung political party balala lenirtem nem memorandum ka agütsütsü.

Maneni iba memorandum indang copy ji human rights dak

sendakba national commissions, religious freedom groups, Dalits, Adivasis, women & children rights activist tem aser National Human Rights commission nem agütsütsü, ta Delhi NCR nung Khristan tamangertemi metetdaksü.

Onoki India President dang tamangba yimsü tsütsü tangar memenepertem kümzüka ayuba ozüing timi benshitsü aser constitution ajanga onok nem temeten balala agütsüba magientsü mesüra Yisu Khrista dak amangtsü mulungertem nem sorkari welfare agütsüba sota mayutsü atema ayongzükker, ta parnokisa ashi.

India nüjiso anguba sülen linük nung Khristan sensotemi National Capital region nung punguben tashi lungkak aitba sentongtem agiogo.

New Delhi nung amenoka

aliba United Christian Forum (UCF) ta ser human rights telok ajanga December 2022 tashi küm ka tsüngda India kübok state 21 nung Khristantem dak tashiyim inyakba lendong 598 atalokba bushiteta lir.

Ano, FIACONA ta ser NRI Christians indang telok ajanga Khristantem dak tashiyim inyakba tatalokba 1,198 bushitetba osang metetdaksüogo.

February 19, 2023 nü lungkak aitba sentong nung Diocese of Delhi Church of North India, Council of Evangelical Churches in India, Oriental Syrian churches, Methodist Church in India Delhi Conference, The North East Church Forum in India, Delhi Fellowship of Christian Churches, Association of West Delhi Churches aser ano tanga telok aikati shilem agitsü.

NATIONALIST DEMOCRATIC PROGRESSIVE PARTY (NDPP)

Facta non Verba

MAKE YOUR VOTE COUNT DO IT CLEAN

NAGALAND - TOWARDS A STATE OF EXCELLENCE



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL

" Sen agi alizükba lenir dang nungi nüburi shimtetba lenirjisa akhüm taketba" Anonymous

- Ungma Baptist Arogo Laishir Telongjem Clean Election Tayongzükba

Election Commission-i tintet rogo aser PwDs dak sendakba osang metetdaksü



Polling ketdangsürtemi postal ballot ajanga vote agütsüsa atema tintet rogotem aser Persons with Disabilities (PwDs) nem teyari agütsüba noksa nung angur.

Dimapur, Tsüklai/February 18 (TYO): Conduct of Election (Amendment) Rules, 2019, aser conduct of Elections (Amendment) Rules, 2020 dak ajemdaker 2020 küm Election Commission-i, July 16 nü Electoral Roll nung züngoksema aliba Senior Citizens (arishi küm 80 temapur) aser Persons with Disabilities (PwDs) aser covid-19 tashidak menar alitsü ta bilemertem Absentee voters ama postal ballot ajanga vote agütsüdaktsüsa telemtetba aigo.

Absentee voters tem atema Postal ballot paper ya election duty ata aliba voter tem nem agütsüba postal ballot paper ama form aser oshi kasa dang asütsü. Taruba 14buba Nagaland Legislative Assembly Election, 2023, koba February 27 nü agütsü lir, iba atema tintet rogo 3228 aser lokti nung tangar memener 173-i applications benokba agizükogo. Polling ketdangsür ana, micro-observer ka, videographer ka aser security personnel tem densema Polling

ketdangsürtemi February 16 nü nungi tenzüka tesem balala semdang tenzükogo. Polling team temi Form 12D indang application nung shisema aliba address dak ajemdaker item voter tem semdang tenzükogo. Postal ballot paper ajanga Absentee voters tem vote agütsüdaktsüsa atema iba inyakyim tenzükogo. Iba category atema voting inyakyim ya polling anogo atongtsü lia anogo ka jelia tembangtsü, ta Chief Electoral officer, Nagaland V. Shashank Shekhar IAS-i metetdaksü.

NPP Candidate Wb.S.Maongkaba Ozükum-i Angetyongpang nübur ajurua jajadagi



24th Angetyongpang A/C nung NPP Candidate Wb.S.Maongkaba Ozükum-i Mokokchung Town nung Ward 3 Süngkomen Ward, Tongdentsüyong Ward aser Alempang Ward nung pa election nung noktakba sangdongba den nüburtem den ajurutepa pa election nung toktepba nükjidong lemsatepba sentong nung jembidang tangokba noksa.

Mokokchung, Tsüklai/February 18 (TYO) : 24th Angetyongpang A/C nung National People's Party Candidate Wb.S.Maongkaba Ozükum-i 24th Angetyongpang A/C nung aliba Mokokchung Town nung Ward 3 Süngkomen Ward, Tongdentsüyong Ward aser Alempang Ward nung pa election nung noktakba sangdongba den nüburtem den ajurutepa pa election nung toktepba nükjidong lemsatepba sentong agia jajaigo. Süngkomen Ward nung mezüingbuba sentong agidang S.Maongkaba Ozükum-i pa election nung toktepba nükjidong lemsatepdang 24th Angetyongpang A/C nung

yimtsüing aika dang lir, item yimtsüingtem aika lenmang junga makaba ajanga nüburtem kanga dang tim atemer, anungji ibaji inyaksü tebilemba lir, iba den külemi ward 3 nung lenmang peria liaka talila yangluloktsü aser ano tesendaktep lenmangtem(footsteps) aika yanglutsü tebilemba lir ta metetdakja ashi. Paise Angetyongpang kübok aliba yimtsüingtem aser Town ward-tem nung New & Renewable Energy ajanga Solar Light bener arua iba tesangwa agitettsü tebilemba metetdaksü. S.Maongkaba Ozükum-isa lanurtem tarutsü putu nung junga azüa litetdaksüsa asoshi mapatong aika inyaksü

tebilemba lir. Lanurtem Skilled Development Training agidaksütsü aser parnokji pei dak aketba sempet repranga parnok dak apet lenmang nung aniojka parnok takum anisüngzükdaksütsü, iba den külemi zünger mapa mongui alirtem teyari aguja coaching agidaksür tatidang balala nung agutsüdaktsüsentong lirta ashi. Küm pungo shia election arutsü iba shiaji temelnshia arutsü aseoshi nüburtemi telemtetba agütsü, anungji Angetyongpang nung temelnshia kadaksütsü asoshi pa nem maongkaba agujangmata S.Maongkaba Ozükum-i adenshia aliba Angetyongpang sanger ayongzüka ashi. Kasa sentong nung Süngkomen Ward Chairman Wb.Limanungsang-i jembiba den taoba mapang Angetyongpang nungi candidate Sashimar-ia jemi, iba sentong Wb.A.Temjen ketdangsüba nung agiba den sentong nung Tsüngrem leniba jazüka Süngkomen Baptist Arogo Pastor Rev.O.Yashi ajanga sarasadem aser lenir aikati shilem agia jembiba den tatem nung telok ajaki sarasadema tembanga liasü. 24th Angetyongpang A/C nung National People's Party Candidate Wb.S.Maongkaba Ozükum-i NDPP Candidate Wb.Tongpang Ozükum aser Independent Candidate Er.Wati den tokteptsü.

DOSE-i private school tem nem metetdaksür

Dimapur, Tsüklai/February 18 (TYO): Directorate of School Education-i sangdong ka ajanga, state kübok Elementary Sections aliba Private Schools ajak dang Recognition, Up-gradation, Renewal of Recognition, aser Inspection (i.e Formats III, IV, V & VI) atema application form tem

Department indang Website: <https://education.nagaland.gov.in> nung February 17 nungi March 15 nü tashi agütsütsü, ta metetdaksüigo. Apply sünüa aliba Private School tem dang atakzükja aliba mapang tsüingda form tem download asütsü metetdaksüigo.

Election atema Special Observers asem shimogo

Dimapur, Tsüklai/February 18 (TYO): India temzüng ozüing kübok Article 324 nung tashi agüja aliba dak ajemdaker, election ochi shia sadem sadema agitettsü atema Nagaland Legislative Assembly, 2023 atema General Election asoshi Nagaland nung Election Commission of India-i Special Observers asem shimtsüba Chief Electoral Officer-i sangdong ka ajanga Special Observers tem indang osang tejangja yamai alitsü:

metetdaksüigo. Ken o dak sendakba nung aser nuburtem tejangraba apir, stakeholder ajak, Political party tem, candidate tem aser nüburtem dang iba osang temulung dang ayutsü aser ken o mejangjai alibatem jangjashitsü aser tashishitsü kar danga lir temalen shisema aliba Special Observers tem den tongteprateptsü metetdaksüigo.

Sl. No.	Name of Special Observer	Phone Number
1	Shri. B.R Balakrishnan, IRS (Retd.) - (IRS: 1983) (Special Expenditure Observer)	9366732507
2	Shri. Ajay.V.Nayak, IAS (Retd.) - BH: 84 (Special General Observer)	9863186669
3	Shri. Anil Kumar Sharma, IPS (Retd.) - PB: 84 (Special Police Observer)	9366297676

Femina Miss India nung Nagaland tenüing nungi Ezhotuo Keyho tokteptsü



Kohima, Tsüklai/February 18 (TYO): Femina Miss India tetoktepba nung Nagaland tenüing nungi Ezhotuo Keyho tokteptsü Beauty and Aesthetic of Nagaland (BASN) ketdangsürtemi Hokolbarnü Kohima nung Ezhotuo Keyho nem certificate agütsüigo. Taruba Miss India tetoktepba nung Nagaland tenüing nungi tokteptsü atema la shimogo, koba taküm Manipur nung agütsü lir.

Ezhotuo ya Miss Nagaland Top 5 Finalist 2021, Miss Beautiful Smile (Subtitle in Miss Nagaland) aser Miss Phek 2021 lir. BASN sangdong ka ajanga ashiba agi, Femina Miss India Nagaland 2023 atema Nagaland nungi tetsür 11-i audition süa liasü. Ezhotuo ya Chakesang kin nungi Sivilie Keyho aser Neikhropeu Keyho na jala lir aser la tang St Joseph College, Jakhama nung Bachelor of Arts 2nd Year lir.

Special General Observer-i lepa reprangshiba senden ayonga amen

Dimapur, Tsüklai/February 18 (TYO): Taruba 14buba Nagaland Legislative Assembly 2023 General Election dak sendakba nung Special Expenditure Observer, Nagaland Balakrishnan IRS-i ayongzüka Kohima district nung expenditure dak sendakba ketdangsürtem den February 17 nü DPDB Hall, Kohima nung lepa reprangshiba senden ka

menogo. Kohima district indang Expenditure Observertem, DC & DEO Kohima, Superintendent of Police Kohima, enforcement Directorate/Assam Rifles/Bank/Forest/CRPF indang Nodal officers ajak aser Nodal Officers Election Expenditure Monitoring Kohima nungeri iba senden nung shilem agia liasü.



February 18, 2023 nü linük Tir, Droupadi Murmu Madurai Airport tonga arudang Tamil Nadu nung Information Technology & Digital Services, T. Mano Thangaraj-i la agizükba noksa nung angur .

Congress-i tekaraba nung opposition party tem ayongtsüla: Nitish Kumar

New Delhi, Tsüklai/February 18 (Agencies): Congress party-i tekaraba nung opposition party tem longjemtsü atema inyakra taruba Lok Sabha election nung BJP tashi ajema akümtsü aser BJP-i menden 100 dang nungi tajemba angutsü, ta Honibarnü Bihar Chief Minister aser JDU tongti lenir, Nitish Kumar-i metetdaksü. Rahul Gandhi leniba nung agiba Bharat Jodo Yatra ajanga Congress asentenshibaji meluladaksütsüla, ta shia Kumar-i, "Ni Congress nung

ozü medemertem dang Yatra junga agiogo aser ibaji manentsüla ta ashir," ta metetdaksü. Taoba mapang BJP teloktep nung dena alisang Nitish Kumar-i, pai NDA teloktep toktsüba ajanga BJP-i Bihar nung jenjang yanglutsü aliba nokdangtet, ta ashi. Linük nung yimtsü tsütsülen nungi rara adokba atema tebilemstü kaa pai, "Linük lemdangba mapang nung azü tokshiyonga Hindu aser Muslim nung nung nung dang lia

aruogo," ta ashi. RSS aija pai, "Linük nüchiso atema raraba mapang nung shilem magirtemi tangbo puti otsü zülushitsü meranger," ta aitsü. Ato kilonser Narendra Modi-i aniba sorkar aija pai, NDA sorkari central investigating agencies amshia melung masüba ola adokertem ola nembangtsür, ta metetdaksü. "Tai tuteta jembirtem dak kechi atalokerar reprangdangang," ta pai ashi.

Pratap Shukla-i Himachal nung Angh inyaksü tenangzükba agiogo

Shimla, February 18 (Agencies): Honibarnü Raj Bhavan nung taoba mapang Union Minister of State for Finance, Shiv Pratap Shukla-i Himachal Pradesh nung Angh inyaksü atema tenangzükba agiogo; Himachal Pradesh High Court nung Chief Justice, Sabina-i ketdangüsü Shukla nem tenangzükba agidaksü. Tenangzükba agiba sentong nungji Chief Minister, Sukhvinder Singh Sukhu densema tongti ketdangsertem kar aden. Shukla-i Sanskrit oshi nung tenangzükba agiba sülen osangbenertem den jembidang pai, iba menden ya linük temzüng kübok temaba menden ka lir aser pai state sorkar den amalitepa inyaksü, ta metetdaksü. Pa Angh shimba atema India Tir dang pelaba lemsatepa pai, linük temzüng kübok pai inyaksü aser pa

jakdang inyakba Anghitemi tenzükba yutsüba mapa ajak renema inyaksü, ta ashi. Himachal Pradesh ya shisaliok tsütsü yakbang state ka lir, anungji state nung shisaliok tajung agütsütsü atema pai meranga inyaksü, ta pai ashi. Paisa, nüburtemi ajangshiba tebilemstü balala metettsü aser state tajungba angatettsü atema pai tayimtsü nung masü saka gari nung ang senzütsü, ta ashi. Sanskrit ya oshi ajak rongnung tetsüti lir, ibayongji pai iba oshi nung tenangzükba agiogo aser pai state nung skill development atema inyaksü, ta pai ashi. State nung ozüng alema temesepba mozü shibelenba atema tebilemstü kaa Shukla-i, iba temenen ya ajanga lanurtem aser linük tarutsü tia raksatsür, ta ashi. "Tanü tejashitsü aser tebilemstü kaji- tangbo kanga

tezülen aliba tesemtem nunga temesepba mozü angur, iba ya nokdangtsü nüngdaka kümogo," ta pai ashi. Himachal Pradesh ya tsüngremtem lima lir, anungji iba state nung temesepba mozü nokdangtsüla, ta shia pai, "Temesepba mozü anema nisung ajaki shilem agitettsü atema ni rangloker inyaksü aser shisaliok rejutem den organizations balala ayongsema mozü anema campaign agitsü," ta metetdaksü. Shukla ya Uttar Pradesh nung Gorakhpur district kübok Rudrapur nungi lir. Pai mezüng RSS den affiliate süa aliba Akhil Bharatiya Vidyarthi Parishad nung dena yimtenren nung ajemoka liasü. 1983 küm pa BJP nung adenba sülen 1989, 1991, 1993 aser 1996 kümtem nung assembly elections nung takok ngua MLA inyak aser 2016 küm nungi Rajya Sabha MP inyaka liasü.



Patna, February 18, 2023: Honibarnü Patna nung 'Save Constitution, Save Democracy, Save India' omen nung ayongzükba senden nung Communist Party of India (Marxist-Leninist) Liberation General Secretary, Dipankar Bhattacharya, Bihar Chief Minister Nitish Kumar, Bihar Deputy Chief Minister, Tejashwi Yadav, Congress lenir Salman Khurshid aser JDU Tir, Lalan Singh nung tangokba noksa nung angur.

MULUNGNEN O



ASO: 16-10-1945 ~ ASÜ: 09-02-2023

Late. S.Noksang Longchar Chungtia, (Rtd. Teacher) ajungbena alima nungi pila or ozü kinungertem mangyim tia nung alidang kija kibong, Arogo aser lokti balala shirnokisa sarasadem den ali rongsen, shisatsü aser nübu agi yaritepogo, nenok ajak dang kanga pelaba iba osang kaket ajanga lemsateper.

Tsüngremi nenok mapa tajung asoshi maneni moajangma.

- Temeim kinungtsü aser kinungertem

Kashmir nung Hizb-ul-Mujahideen kiralongrar 3 apu

Srinagar, February 18 (Agencies): South Kashmir kübok Kulgam district nung Hizb-ul-Mujahideen kiralongrar telok nungi züngsem asem den injang aser raraba hadir kar puogo, ta Honibarnü Jammu & Kashmir Police-i metetdaksü. PC Hatipora aser Police station Behibagh nungi police senteper Hokolbar aonung kiralongrar asemji apu, ta ketdangsertemi metetdaksü. Police otongdar kati ashiba agi, kiralongrar kar raraba

hadir bener senzüba osang lazükba sülen Kulgam police-i Daderkoot, Alamganj Crossing nung kiralongrartem mita ao. Police-i par asem ket nungi pistol ka, pistol magazines asem aser injang 13 apu. Par asem apuba sülen parnok dang asüngdangyaba ajanga parnoki kiralongra mapa inyakba aser kiralongrar telok balala yariba jangjaogo, ta police-i metetdaksü. Iba dak sendakba nung ken o ka benokba sülen maneni bushisüngdangdar.



February 18, 2023 nü Ranchi nung aliba Raj Bhavan nung C.P. Radhakrishnan-i Jharkhand Angh tenangzükba agiba sülen Jharkhand Chief Minister, Hemant Soren-i pa agizükba noksa nung angur.

Feb. 22 nung Delhi nung Mayor election agitsü

New Delhi, February 18 (Agencies): Supreme Court-i Municipal Corporation of Delhi (MCD) dang ghonda 24 tsüngda Delhi nung MCD election agitsü anogo sangdongang, ta tuyuba sülen anogo ka dang lirbo Lieutenant Governor, VK Saxena-i February 22 nü election agitsü agizükogo. AAP tongti lenir aser Delhi Chief Minister, Arvind Kejriwal-i February 22 nü anüngdang 11:00 ako nung Mayor election agitsü benokba LG Saxena-i agizük.

Delhi LG-i shimba MCD züngsemtemi mayor election nung vote agütsütsü makok, ta Hokolbarnü Supreme Court-i obendang agüja liasü. "Mayor shimba sülen ang pai ketdangüsü tanüngba elections ajak agitsü atema senden ayongzüktsü. Mayor election mezüng agitsüla; iba sülen ang deputy shimtsü atema mayor leniba nung senden ayongzükba amentsü," ta Chief Justice of India, DY Chandrachud-i metetdakja liasü.

Supreme Court-i Mayor election mezüng agiba sülen Mayor tasena lenisüba nung Deputy Mayor aser Standing committee züngsemtem election agitsü tuyua liasü. MCD election onük nung AAP aser BJP tsüngda mangatettep adoka tesüiba ita ana tsüngda Mayor election asemen tashi thinena aruba sülen Supreme Court-i Mayor election nung LG-i shimba züngsemtemi vote agütsütsü makok, ta oshidang agütsüba den külemi Mayor election agitsü atema anogo sangdongang, ta tuyua liasü.

Mayor election nung LG-i shimba züngsemtemi vote agütsütsü melaba ajanga Hombarnü MCD senden nung mangatettep adoka senden thinena liasü. Iba jakdang January 24 nüa AAP aser BJP tsüngda kasa onük nung mangatettep adokba ajanga senden thinena liasü aser January 6 nüa kasa onük nung mangatettep adoka senden thinen.

MCD elections yaküm December 4 nü agiba sülen December 7 nü election osang sangdonga liasü; iba election nung AAP-i menden 134 angu, BJP-i menden 104 aser Congress-ibo menden 9 nung dang takok ngua liasü.

MCD elections yaküm December 4 nü agiba sülen December 7 nü election osang sangdonga liasü; iba election nung AAP-i menden 134 angu, BJP-i menden 104 aser Congress-ibo menden 9 nung dang takok ngua liasü.



TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 19, 2022

Tsüngremer mapang ataba

Nisung asünungji aiben asenoki aseni jangraba aser aginüba ataloktsü asoshi ariteper. Idangji asenoki aiben sobaliba amadoker, awashi memetet akümer, ozünga raksar aser Tsüngrem dena amadoker. Aji oda, aiben asen taküm nung aseni bilembaji dang atalokerbo ojang ta bilemba agi auyaa auyar, ochimashi mapa inyaker aser nisunga dena tepseter. David taküm nunga pa chuba akümstüba mapang matongdangyongi, pai dang aritep nungbo chuba melamelaa akümstüsa koka liasüba otsü Laishiba nung 1 Samuel 26 nung shia angur. Kecha meimlai alidang aser nisung jakdangbo kecha chuba akümstüla kibong nungia masü ser nung Tsüngrem ainker Samuel ajanga David tanur asüba mapang Israel madak chuba asütsü mezüja shimteter toktsü, saka pai Goliat tepset tashi nunga pa chuba maküm. Ashiko, aseni asübo Goliat tepseter Israel tsürtemi arürleper ken tajung tenlokja mangkoterongi atuba anogo nungsa Goliat atsüngdoker Israel chuba akümstü merangla. Yamaji ka merangdang nunga, panüji David asoshi takoktsü liasü, kechiyong Saul chuba mulungjang tetsübu agi sünger nübertemi pa dak temulung lemtettsüsa pa mali asü. Iba jagiang Israel tsürtemi yimjak nung Saul dang nungibo David nemang konang nungsang tuluba agütsü. Ajisüaka, aseni bilemba amaji David-i meblem. Paibo chuba akümstü atema lenmang tatsüba mebushi. Pai Tsüngremer mapang aru ataa Tsüngrem anasa ali saka Saul tsüngdang nungibo tajenang ajen. Aji oda, David asoshi tatidang tulutibaji pa chuba kümnüba masü saka par tsükchir ayongayonga tepsettsüsa ajuruba mapang to liasü. Iba anogo nung to Tsüngremi Saul aser par sepai meyirijang asemprongla amui odaktsür lia David-i Saul taküma puteta liasü. Iba mapang David kajetba nokinketer Abishai—i David dang pa nü agi Saul dak anabena masü khen nung ali nung neploka tsüngdi ta asüngdang. Iba mapangji Abishai koda shi azü ajak jaa atua jangratema bilemer alitsü ! Ajisüaka, David-i ashi, "pa tetepset, pa ya Kibubai mezüja shimtetba chuba...". Goliat tepsetba anogo nungtosa pa chuba makümyonga, iba anogo nung yabo Saul chuba ali nung neploka tsüngseta yur Israel madak "ni chuba kumogo" ta sangdongtsüsa ano mapang tajung ka liasü. Ajisüaka, David o Abishai nati Saul amui orr lia pa meyong nü aser tzu bongdang ang tanemi bener tenemi tur tabeni yokang ta ayimoktsü. Asenok taküm nung takok aser temoatsü angubaji Tsüngremer mapang shitak nung Pai moatsüba mesüra aji temoatsü masü ta Davidi angatet. Tang ya asen lima nung yimsüsür shimba mapang lir. Iba ama mapang ka nung ya, Davidi bilemba amaji asenokia iba ya Tsüngremi kü nem mesüra ozü nem agütsüba mapang aser jenjanga ta bilemdanger asü ? Tanü asen lima nung election nung tokteper aser tayariteperitem karbo Tsüngremer mapang angatetba nung masü saka yimten tashi aser yimsüsüba menden aginüba agi aritepba purtema alitsüa akok. Ano, ashiko nübertem tia aser yimten telok angatetba agi masü saka yakta yimsüsür kümnüba agi mesüra kar atsüngdoknüba agi election nung tokteperitema alitsüa akok. Tsüngremer mapang ka lir, anungji yakta atongba agi talangka alitsü ta masü mesüra menurji matongtsü ta-ka masü. Tenüngsang ken 37:7 nung David-isa lepshia ashiba ama, Kibuba mapang atatsüba asenok asoshi kanga tongtibang tangatettsü lir. David-i pa chuba akümstü asoshi Saul anema kecha meinyakaka, pasasa Saul yimli tashimaitba aküm aser tesüsabo pai pasasa tsüngseta asüba Saul chuba otsü asenoki azünger. Asenok taküm nunga election nung takok angutsü atema tangari tasa tamajung tapu balala agüja alitsüa akok. Aji oda, karbo rongsen agi aser karbo tashiyim agi ta kokyonga ao nung dang, len tatsübalen aoba agi karaa atong ama, aseni aginüba yimsüsüba menden aser jenjangji yakta atongtsüa akok. Ajisüaka, Tsüngremer mapang nung mesüra aseni yangluba len tatsüba len nungi atongba tesemji asen meyong masütsü aser mendenjia asen menden masütsü. Idakji lia Saul chuba amaji pei menden nunga junga mementet peisasa pei taküm mapayui kümra koda ?

OLEMSABANG

AYIMMOKTSÜR

~ T. Lima Tzüwar, Ungma Aonglenden, Artang Ward

Yangi asen Aor Aotsür aser nütsüng nübur aser Nagatsür aser Naga nunger nütsüng nübur dang yamai shinür, asen Nagaland ya Khristan lima asünung aser Nagalandji Khrista asoshi ta ayimtenner asünung Khristan lima ta angateta alitsüla. Electionji tanü temadoktsü saka kiyonger kiyonger na meputep adianu adianu meputep küm junga o mejembi alitsüji koda taktsü mapa asütsü. Nai aser ni pai aser lai shiba nem vote agütsüner aji pei mulung lir. Tanü asenoki vote agütsür külen shiba atokdir atokaka pa ji atoker külenbo parnoki asenok mangutsü. Tsüngküm mapang nung parnok asenok süia aodang aoi tang baloktsütsü aser mei mapang lishi tang baloktsür aotsü asünung nungsen shingaia mejembitsüla. Nütsüng nübur tsübudakja amokmerena bomb mapoktsü aser rubber agi yangluba lijak agi shinga meyirutsütsüla. Shibasa election air pa/laji sen akaba ajanga tang election air asünung nübur mesüzüka polling anogo nung polling booth anasa jaka jaka nung sen amer nübur memesüzüktsüla. Tanü asüng yabo tebur dang nungi tetsürtem-ang tamajungba asünung tetsürtem kanga tang kümdanga alitsüla. Shiyonga aruba ama aseni vote agütsüba aser election mapang rarapangsen tenzüdakja tangar dang o tamajung shia metsü metsülokja liaka parnok adokerbo parnoki asenok mangutsü asünung aji angateta alitsüla. Vote ka yong sen lakh junga meshibaji Tsüngrem tsüngdang khuret tulu lir. Asen Ao kin nungi shibasa election nung takok ngudir asen Mokokchung district ya sentoka meyutsüi aser nenok alitsü meblemi asen Mokokchung district telongtet ajak nung terenlok mapa inyaktsütsü kanga mepishir. Nüburtemi nenok tenzüksü masü nenoki dang nübur tenzüksüla. Election nung aobaji teblema kechiyong nenok ket nung sen aliba ajanga tang election air asünung nenoki nübur nem sen agütsür aser nüburtemia parnoki kwi meshir aji agütsür yamaji asüyonga nenok MLA mesüra minister akümer. Saka asen Ao kin ajungtsü aser Mokokchung district renloktsü asoshi sen aser yi iba den mozü mamshitsü kanga mepishir. Injang prangpong aser rubber agi yangluba lijak amshia nisung südakstütsüsa mesüra yirutsütsüsa tasa tamajung meyanglutsüla. Asen Nagaland yabo tilaka tang saka partybo aika asünung koba teloki Govt. bener aotsüar memetet asünung Nagaland nung aliba nütsüng nübur ajaki sen memeshie pei senti voteji nai shiba mulunger pa nem vote agüjangma. Asenoki election air dang sen meshi nung asen Nagaland ya koganga tejakleni maotsü merenloktsü. Taoba mapang nunga nütsüng nübur ajaki longkak aita rongshipet rongshia aliba ajanga parnoki election mapang nangzüktenbatem 5 nung ana tang inyaktsü ajia ita ana asem nungbo raksa yonga aruba angur. Paper nung parnoki mapa inyaktsüba apibo Nagaland ya kanga junga alitsüba sür nung jembiba o mapa inyaktsüba na tependang lir aser Naga nunger nüjiso bushirtema kechi tia nung lir.

Temeim Naga nungertem aser Nagatsürtem aser asen Aotsür aser Aor nütsüngnübur tajungtem aser lanur tajungtem asen Nagaland ya Khristan lima masü no? aser taküm Tsüngremji asenoki amanger aser külemer masü no? asen sür külen kotaki aotsü asoshi amanger masüna aser asen Nagaland Yisu yimsü arur küm 150 tama arur masü na? pei mulungjang nung kechisa bilemtar kanga tang junga shisa dangangma no. Taoba küm tom nung asen Nagaland govt-i tamang yimsü atema kangabo tejembi ta paper nung adokstüba to koda parnokbo tamanger masü no? June July August nung India Home Minister pai tamang yimsü atema tejembi ta asemben tashi pa noksa dena atokstübatato koda bilemdangang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Uttar Pradesh nung Pastor Vijay Masih tang tashi mechioker



November 4, 2022 nü Uttar Pradesh kübok Fatehpur nung police-i Evangelical Church of India (ECI) züngsemtem apuba sülen tangokba noksa nung angur.

New Delhi, February 18 (Agencies): Northern India nung court-ibo pastor ka nem bail agütsüogo, ajsüaka Hindu yimsü alia amangertemi pa anema ano tiyazü nung ken o tasen benokba ajanga tang tashi jail nungi mechioker, ta pastor kinüngtsüi metetdaksü.

Pastor Vijay Masih kinüngtsü, Preeti Masih-i, "Onoki timtem mapang ajangshidar, aser iba ya kodang ang tembangtsüar memetet," ta metetdaksü.

Pastor Vijay jail nung puokba sülen February 17 nü anogo 110 jungogo.

Uttar Pradesh kbübok Fatehpur nung aliba Evangelical Church of India (ECI)-i court nung temepishiba agütsüba nung ajemdaker January 16 nü court-i pastor bail nungi chioktsü obendang agütsü, ajsüaka Hindu yimsü alia amangertemi ano pa anema ken o tasen benokba ajanga pa ano maneni tepuokdak lir.

Yaküm April 14, 2022 nü pastor apuba sülen anogo asem dang lirbo pa bail nung chiok saka ano maneni October 30 nü apu.

Uttar Pradesh Prohibition of Unlawful Conversion of Religion Act, 2021 ozüng kübok yaküm April ita nungi Fatehpur kübok Hariharganj nung Pastor Masih den Khristan 49 apu.

Vishva Hindu Parishad (VHP) telok nung lenir kati April 15 nü Khristan 35 aser mejangjaba Khristan 20 anema ken o benoka liasü.

January 16, 2023 nü court-i Pastor Masih bail nung chioktsü obendang agütsü ajsüaka January 23 nü Virendra Singh-i pastor den pua alir Khristantem anema ano ken o tasen benok.

Khristantem jagi Uttar

Pradesh Prohibition of Unlawful Conversion of Religion Act anema inyakba dang masü saka ashikülak mapa inyak aser ozüng alema asalentong yanglu, ta Khristantem nem tai tongloktsü.

Yaküm April 14 nü Hindu yimsü alia amangertemi "Jai shree Ram" ta ayimdena Pastor Masih leniba nung tekülem sentong tagidak mapang timtem agüja liasü. Hindu nungertem jagi Tenla ki temeket nung gate anaprong shibangba sülen VHP lenirtemi police aja.

Osangbener den jembidang pastor kinüngtsü, Masih-i, "Onoki police-i kechi tim, ibaji inyaksü ta imlaa liasü, ajsüaka parnoki Khristantem indang aadhaar number, tasoba anogo, address aser permanent address meshia liasü," ta metetdaksü.

"Police-i onok dang 'nenok police station-i anir aotsü saka chioktsü' ta ashi. Police-i ashibaji onoki amanga liasü anungji pastor den onok 35 police station-i anir ao," ta lai ashi.

VHP-i jangjaba Khristan 35 aser mejangjaba Khristan 20 anema First Information Report (FIR) benok aser court-i anir ao. Kanga tantsür-tambur mesüra temang nung timtem alir 9 bo kidangi aotsü mela saka tetsür-tanurtem densema tanungba Khristan ajak jail nung puoka liasü.

Ajsüaka anogo ana dang lirbo April 16 nü bail nung chiok.

VHP lenir, Himanshu Dikshit-i, Tenla kidang Khristantem Hindu nung 90 kangshia Khristan yimsü dangi meyipdaksü, ta tai tonglokja liasü.

VHP-i benokba ken o nung ajemdaker police

ketdang Mishra-i, "Khristantem jagi Hindu yimsü amangertem mesüzüka missionary schools nung tanurtem admission agitsür, missionary hospital aser melungtet telok balala nung lanurtem nem mapa agütsür. Khristantem yimtsüngtemi oa yimdaklirtem nem senotsü teyari agütsür. Khristantem jagi sensakertem nem nashi-a alitsür," ta metetdaksü liasü.

Paisa, iba Arogo nung züngsemtemi nisung 1,000 nungi 2,000 shibo Khristan yimsü dangi meyipdaksüogo, ta ashi.

Ajsüaka pastor kinüngtsü Preeti Masih-ibo, "Khristantem mesüzüka mesüra kangshia Khristan yimsü dangi meyipdaksür ta tai tongloktsübaji tiyazü. Police-i onok dangbo kecha masüngdang saka telok kati aitsüba oji dang angar jembir," ta aitsü.

ECI nung general secretary aser legal officer, Edwin J. Wesley-i, "VHP lenir aser pa pusemertemi tiyazü nung otsü yanglur Khristantem anema inyaker. FIR nung shia alibaji khenyongi tiyazü. Tenla kidang jagi odangra idakji nisung 60 dak tali masemtsü, anungji parnoki Tenla ki amakba mapang Tenla kidang alirtemji nisung 60 den ishiba liasü," ta ashi.

Preeti Masih-i, la den kinüngbu nati kiyong nung Hindu nung dang masü saka ajak den tesendaktep tajung ayutsü meranger; yamaji tesüiba küm aika parnok tesünep nung dang lia aruogo, ajsüaka tang ozü kiyongertemi onok anema jembiba ya onoki mamangteter, ta ashi.

Pastor Masih-i tesüiba küm 13 tashi ECI Arogo nung pastor inyaka arudar.

ANOGO ABEN TSÜNGREM DEN

INDANG-INDANGA LITETBA

"Khrista Yisu nung temalen nungi Tsüngremer tajaba tajangzük alizüngji tongtetsüni arishir" Filipi 3: 14

Ni alu nung mapa inyakdang aiben ni tractor ka ajanga aluji la-a liasü. Anepdang ka ni aluji alatsü asoshi tractorji atemloka mapaji inyaksü tenzük. Oda anepdang temenungratsü ka, ozü sangnutem ola angaba den mopung taneb agia ni aluji inyak, saka tractor ola jagi item temenungratsü shirurutem olaji jakbangatok. Taküm nung nükjidong ka yur idakji rangloker jajatsüla. Ka nung dang rangloker inyakra takok ngua inyaktetsü. Nükjidong ka makaba ajanga tebilemba matongtsü.

Kasa tajungshiba ka Pauli ashir; 'Khrista asoshi ajak tesama ta züngshia' (T.8) 'Taoba indang amatoker' (T. 14)' teimla ka nung (T. 9-11) pa jilu ajizüka (16-17) aotsü ajungshir.

Yamaji litetra, Tsüngremer sentong taküm nung ataloktsü.

Libya linük nung pua aliba Coptic Khristan trok chiokogo: Egypt

Cairo, February 18

(Agencies): Anüolen Libya nung pua aliba Egypt nung Coptic Khristan trok chiokogo, ta February 17, 2023 nü Egyptian foreign ministry-i metetdaksü.

"Tripoli nung aliba Egypt Embassy-i onok dang, Libya nung pua aliba Egypt nung trok chiokogo ta metetdaksüogo," ta ministry otongdar, Ahmed Abu Zeid-i Twitter ajanga metetdaksü.

Egyptian foreign ministry-i Egypt nung Khristan chioktsü atema Libya ketdangsertem den inyaka aruba sülen tatema parnok chiokogo.

Khristantemji anüdoklen Libya nung dang mapa inyaksü permit liasü, saka parnok anüolen

Libya nung ozüng alema mapa inyakba agi apu.

Yimten lenir, Mostafa Bakry-i twitter ajanga, Khristantemji kisüjensüba mapa inyaksü atema maangka bushiba mapang nung puer ao, ta metetdaksü.

Coptic Orthodox Arogoi, Khristantemji Benghazi nungi Tripoli-i aoba mapang nung apu aser parnok chioktsü atema parnok nisung shia dang dollar sen 30,000 khanga liasü.

Egypt nungi Coptic Khristan aikati Libya nung mapa maangka bushir aser 2015 küm nungbo Islamic State kiralongrar teloki Egypt nung Coptic Khristan 21 tekolak tangzüka lepseta liasü.

Feb. 26 nü Arogo aikati Ukraine atema ghonda 24 sarasademtsütsü

February 18, 2023: Colyton nung aliba St Andrews Arogo den Branscombe, Musbury, Northleigh aser Southleigh nung aliba Arogo February 26 nü Ukraine linük atema ghonda 24 sarasademtsütsü.

Russia-i Ukraine amak tenzükba sülen küm ka ajungba nüngtem nung Holyford Mission Community nung Khristantem St Andrew Tenla kidang ghonda 24 Ukraine nung atema sarasademtsütsü.

February 26, 2023 anüngdang 11:00 ako nungi tenzükba February 27 anüngdang 11:30 ako tashi parnoki sarasademtsü. Arogoi sarasadem nung shilem agirtem atema chiyungtsü renemtsütsü aser yangji aliba Ukraine nung anenzükdaksütsü.

Children & Families Worker nungi Linda Joy-i tanurtem atema sentong ayongzüka katsütsü.

Ghonda 24 sarasadem sentong ya shilem asem lemsar

agitsü; sentong nung Tenüngsang Ken nungi Lai azüngtsü aser minute 20 osangtajung ken atentsü.

Hombarnep 11:30 ako nung tatembangbuba sentong agitsü.

School tem nunga tanurtemi Ukraine atema sarasademtsütsü.

Kasa sentong nung Ukraine atema dang masü saka alima tesem balala nung rara aliba tesemtem atema-a sarasademtsütsü.

Devon nunga Arogo ajak dang item ama sentong ayongzüka agitsü ajungshio.

Iba sentong ayongzüka agitsü atema osangtsüsangji Holyford.org mesüra Facebook page, @holyfordmission nung angutsü.

Osang tejangja metetpelerntem Administrator, Mrs Caz Jefferies Office@holyford.org. mesüra e Rector, Fr Steven rector@holyford.org ajanga tongteprateptsü akok.

AO OSHI ANGAZÜKDAK:
TANÜ ANGAZÜKTSÜBA OJANG



Oya
(n)tenu nungeri teyi dang ajaba (address to elder sister)
* **Oyalai** onok dang kanga meimer.
Ozü
(pron) pei kibong, pei telok (our)
* Ozü kibongibo kibubasa tenzüksü.

OLONG PAITEP # 6433

1		2		3		4	5			
				6						7
		8								
9				10		11				
			12						13	
						14				
16						17				

TIPLÉN		LANGTSÜNGLEN	
1. Nisung jenti	-(5)	1. Tenük telong	-(9)
4. Tsük rudenba	-(5)	2. Committee dang ajar	-(5)
6. Temzüng tesashi	-(5)	3. Yagi ki okdoker	-(7)
8. S _ _ _ i	-(3)	5. Yim lenmang	-(5)
9. Nisung telemsa	-(3)	7. Temoatsü keter meyipa aruba	-(9)
10. Anogoshi	-(4)	11. Kanga junga menemba	-(7)
12. Ajanga aor	-(4)	12. Majinü	-(5)
13. Tsük rizüngdak	-(3)	13. Tzüma nung senzüba	-(5)
14. Tebang nungi adokba	-(3)		
16. Süngdong talemangliba	-(5)		
17. Meputep	-(5)		

OLONG PAITEP # 6432 TELANGZÜBA

TIPLÉN :		LANGTSÜNGLEN :	
1. Tansütsü, 4. Mijang, 5. Pila,		1. Temola, 2. Saisapong, 3. Alak,	
6. Tasa, 7. Nao, 9. Oko, 10. Putu,		5. Pongtsüng, 8. Shirem, 11. Ajak.	
12. Jung, 13. Tzüwar,			
14. Tsüngrem.			



ELECTION MAPANG AKTEM NEMNEMER :

Azü : Hai AK sünglang toko nung nokdaker kechiba yamai rasa nemnemer?
AK : Kinunger AK!! Ena Alemlü tetzü tebou mapang nung ana tia ya melentepako ya nabo kibur kidang ayong ayonga mener alir, saka bilemdangangma, Khrismas arudanga AKla tepsetang, New year arudanga AKla tepsetang, Moatsü arudanga AKlasa tepsetang ta Tsüngrem mong arudanga AKla tepsetang, Tulus kar arura AK ka tepsetang ta, aser birthday mapang nunga AKsa tepsetang ta, Ano tang election arudar anogoshia AKla dang tepsetdarji onokia metikani, clean election ya sen leper aser AK leper ka kümogoni ta nai danga kibur Meimchir dang ya shiangkoto, O Azü!!!!
Azü : Nguo, Nguoooo!!!!
~ Lilir : I. Kilang, Ajem, Indisen, Dimapur.

PAJSC-APPSC-i anogo anabuba Arunachal mokdang lungkak ait



Itanagar, February 18, 2023
(Agencies): Pan Arunachal Joint Steering Committee (PAJSC-APPSC)-i ayongba sentong ajanga tanü Arunachal Pradesh kübok tesem aika nung kongshiogo.
Arunachal Pradesh Public Service Commission question paper temai adokba ken o atema PAJSC-APPSC ajanga onük 13 takhangba agüja lungkak aitba sentong ayongzüük.
Honibarnü Capital Complex kübok Itanagar, Naharlagun, Nirjuli aser Banderdewa tesemtem nung shishilembadak, bank, shisaliok rejutem, sorkar aser ija office ajak shibang aser lenmang nung garitem

mesenzü.
Külen lungkak aiter nisung meyirjang aikati tyre tem rondoka NH-415 mokdanga liasü.
Arunachal sorkari Hokolbar nikongdang 6 ako nungi Deobar nikongdang 5 ako tashi Itanagar capital region nung internet services shibanga lir. Iba 'public safety' atema lir ta sorkari metetdaksüogo.
Mokdang ayongba mapang lungkak aiter temi police barricades raksatsüba, police-i süng agi azükba aser tenük amdaktsüba mokozü amshiba sülen law & order timtem tulu madoktsü atema internet services shibanger, ta sorkarisa

ashi.
Hokolbarnü lungkak aiter aser police aika mepetmesü adoka raratepdang yirua liasü.
Iba tensa ajanga Chief Minister Pema Khandu-i Hokolbarnü Arunachal Pradesh Public Service Commission (APPSC) chairman aser züngsemtem tezüngzüktep agiba sentong thinentüsü aküm.
Paisa PAJSC-APPSC tanishirtem Honibarnü civil secretariat nung senden ka amentsü jaok saka lungkak aiter temi ibaji magizük.
Hokolbarnü state sorkarisa tanü class V, VII aser XI indang state board exams agitsü aliba thinen.

Tripura election sülen tatalokba 16 nung nisung 21 puogo: CEO Kiran Gitte

Itanagar, February 18, 2023
(Agencies): Tripura nung election agiba sülen tatalokba balala nung nisung 21 puogo.
"February 16 nü aonung 10:55 ako tashi polling süogo" ta Tripura Chief Electoral Officer Kiran Gitte-i ashi.
"Polling station 1682 nung nikongdang 4:00 ako sülena polling asü. Nisung lakh 2 shi tarensena noktak. Sepahijala district kübok Toibandal nung polling maparen tatembangba inyaka liasü. Onoki strong rooms nung security talila agütsüogo aser CCTV coverage den security three tiers lemsüka lir" ta pai ashi.
Political party temi Assembly

Constituency ana nung re-poll asütsü akhanger aser itemji West District kübok Golaghati aser Gomati district kübok Matabari Assembly Constituency lir, ta Gitte-isa ashi.
"Onoki takhangbaji Observers dangi benogo aser parnoki tensa reprangba den CCTV footage ajanga re-poll asütsü kuli kecha mengutet. Anungji observer-i assembly constituency ana nung re-poll asütsü kecha mashi" ta pai metetdaksü.
Polling station tem nungi meter 200 shi pilar tatalokba 5 liasü, ta CEO-isa ashi.
"Polling asüba mapang polling station telung nungbo

lendong kecha matalok. Tatalokba 5 atema police-i FIR 6 benoka lir" ta paisa shisem.
"Election agiba sülen Hokolbarnü Khowai district kübok tesem ana- Natunbazar aser Kakraban nung lendong atalok. West District kübok Ranirbazar aser Radhanagar nung lendongtem atalok" ta Gitte-isa metetdaksü.
Election agiba sülen lendong teimba atalokbaji Sepahijala district nung liasü aser iba district nung tatalokba 9 liasü, ta paisa ashi.
Election agiba sülen tatalokba 16 atema FIR 16 benokogo aser nisung 21 puogo aser nisung 200 dangi notice yokogo, ta CEO Gitte-isa ashi.

8th Schedule nung Khasi aser Garo oshitem dendaktsütsü: TMC

Shillong, February 18, 2023
(Agencies): Meghalaya nung TMC sorkar kümra Constitution indang Eighth Schedule nung Khasi aser Garo oshitem dendaktsütsü, ta Trinamool Congress National General Secretary Abhishek Banerjee-i nangzüikogo.
"Onoki tatem tashi noktaksü. Khasi aser Garo oshitem Constitution nung Eighth Schedule nung dendaktsütsü. Onoki Parliament nung iba ken o benoktsü aser tatem tashi inyaksü. Onoki Meghalaya nung mezüng tetsüng ajemokba anogo nung ni iba ya nangzüikogo aser iba nungi masetshitsü" ta Abhishek Banerjee-i ashi.
Shillong nung aliba Police Bazaar nung lokti sentong ka nung jembidang "Meghalaya nung Meghalaya nungeri yimsü

asütsü. Tesüiba küm 5 tashi MDA sorkari nübertem sen chitsüogo, nübertem nüngdakbatem mereprang aser state tejakleni aoba nung tetsükdaktsü agütsü" ta paisa ashi.
"Onoki telok o telok tsüngda mepetmesü adoka raraba nung mamanger. Onoki telok ajak putepa alitsü nung amanger. TMC ya Temple, Mosque aser Church atema lir. Ano TMC indang tanga teratet ji 'Trust Mukul and Charles' lir" ta Abhishek-isa shisem.
Meghalaya nung TMC-i sorkar akümba sülen ita ka tsüngda TMC indang tenangzüka 10 inyaksü, ta paisa ashi.
"Ni taoba mapang MYE Card aser WE Card indang jembio, item scheme ya Bengal nungbo onoki sorkar

akümba sülen ita ana tsüngda inyakogo. Saka yangibo anogo 60 masü saka sorkar akümba sülen anogo 30 tsüngda inyaksü. Ni ibaji nenok dang nangzüker" ta Abhishek-isa metetdaksü.
NPP aser BJP ajanga ochimashi inyakba ajanga Meghalaya merenloker, ta paisa shisem.
"BJP-i par sorkar dak tai tongloksür aser iba ya temenünüsüka lir. Tesüiba küm 5 tsüngda sorkar yimsü süa arurtem merenshitsü tya BJP-i ashir, saka parnok sorkar nung liasü. Amit Shah-i pa sasa pa nem temerenshi agütsütsü asü? Amit Shah-i Conrad Sangma merenshitsü asü? Amit Shah-i Conrad Sangma dang kecha meshitettsü kechiyong sen ajakji pa aser Delhi dangi ao" ta Abhishek Banerjee-isa ashi.

TTP-i Karachi Police HQ amak; kiralongrar 3 tepset



Tehreek-e-Taliban Pakistan (TTP) puri Pakistan kubok Karachi nung police headquarters amakba mapang tangokba noksa angur.

Karachi, Tsüklai/February 18 (Agencies): Hokolbar aonung Tehreek-e-Taliban Pakistan (TTP) puri Pakistan kubok Karachi nung police headquarters amakba sülen nisung pongu asü aser nisung 19 yiuogo.

Kiralongrartem yagi prangbong aser grenade amshia iba police station amak aser sabanga ayu. Iba sülen TTP otongdar Mohammad Khorasani-iba police station ya parnoki amak ta nangzüka liasü.

Iba police station amakba kiralongrar asemprongla khasetogo.

Lendong nung civilian ka, Pakistan army ranger ana aser sepai ana ta taküm samaogo aser iba den nisung 14 tashi yirua liasü. Yirur alirtem rongnung nisung kabo temang kanga mejungi lir.

Police aser kiralongrar na tsüingda ghonda pezü dak tema khatepa liasü. Kiralongrartem Hokolbar aonung 7 ako shi nungi iba police station sabanga liasü aser Sindh province nung

ruling party Pakistan People's Party lenir Murtaza Wahab Siddiqui-iba kiralongrartem 11:15 ako shi nung tepsetogo, ta tweet asü.

Pakistan nung amendaker aliba media outlet, Dawn aser GeoNews den sensaksemba mapang DIG East Muqaddas Haider-i, kiralongrartem ya Toyota Corolla ka nung mener Karachi Police Station (KPO)-i aru. Paisa, parnok asemrongnung kati ki flour pezüba nung pasasa pokset aser tanungba ana ya police temi khaseta liasü, ta ashi.

"Karachi Police office ya kiralongrar asema amak. Parnok asemprongla süogo. Police force, rangers aser army-iba tensa azioktsü atema teyari agüja liasü. Parnoki tasü ita jenjang agiba atema tenüngsang agütsür," ta Sindh chief minister Murad Ali Shah-i mapa tatsüka lir ashi.

Karachi police office ya Karachi kubok Sharea Faisal tesem nung amendaker lir, kong Pakistan Air Force indang Faisal

Base densema tanga tongtibang office aika amenoka lir.

Lendong nung asürtem aser yirurtem ajak Jinnah Postgraduate Medical Centre-i bener oa liasü.

Murad Ali Shah-i ashiba agi, kiralongrartem station amakba mapang police tekolakba office nung maliasü. Dawn sangdong ka ajanga ashiba agi, pai IG office amakertem aputsü atema tetuyuba agütsür liasü. Pai ashiba agi, yimti indang police tekolakba amakba ya agizütsü makok.

TTP puri taoba mapanga Pakistan police aser army installation tem sabanger maka aruogo.

2011 küm iba kiralongrar telok yagi Karachi nung amenoker aliba naval base; PNS Mehran amak. Parnoki iba base ghonda 17 tashi sabanga ayu aser security personnel 10 tashi tepseta liasü.

2014 küm TTP-i Karachi nung Jinnah International Airport amak aser nisung 14 tepseta liasü.

North Korea-i 'ICBM-class' missile ka tendang

Seoul, Tsüklai/February 18 (Agencies): North Korea-iba ballistic missile ka tendangogo, koba Japan indang economic exclusion zone nung tsüka liasü, ta Japan aser South Korea ketdangsürtemi metetdaksü.

US aser South Korea na taruba hopta Washington nung tabletop exercise agitsü sentong yanglur aliba mapang Honibarnü North Korea-iba missile khatokogo.

"North Korea-i mejangjaba ballistic missile ka parnok indang anütok tzüym len khatokogo," ta South Korea indang Joint Chiefs of Staff-i ashi.

Japan sorkar otongdar Hirokazu Matsuno-i osangbenertem dang ashiba agi, North Korea-i, ICBM-class ballistic missile ka parnok anütok tzüym len khatokogo. Iba missile ya Pyongyang-i mapangshia tendangba long-range



intercontinental ballistic missile asütsü ta bilemer. Honibarnü khatokba missile ya anüngleni km 5,700 shi khaketa tur km 900 yima or tsük, ta pai ashi.

Japan Ato Kilonser Fumio Kishida-iba ashiba agi, missile ya Hokkaido anüolen Japan indang EEZ (exclusive economic zone) nung tsük asütsü ta bilemer.

Japan nung ketdangsürtemi ashiba agi, iba missile ajanga teraksatsüba bener arutsüba osangbo kecha mali.

South Korea nung ketdangsürtemi ashiba agi, long-range missile asütsü ta bilemba iba missile ya Pyongyang anasa Sunan tesem nungi khaketa yok asütsü. Sunan ya Pyongyang International Airport amenoka aliba tesem lir aser iba tesem nungi tawa North Korea-i ICBM timba tendangogo.

South Korea-i US den military exercise agitsü sentong aliba sangdongba sülen North Korea foreign ministry-i jenjang tesashi agitsü ta amokmerenba sülen anogo ka lir iba missile tendangogo.

MEYIPTSÜR

Tir Yimyim adok 126 Feb 17 nung Tai Nangzükba sangdong Mr. Imkongkilep aser Nungshiwaten ajanga adoktsüba meyiptsür.

1. Shri. Maongkaba 24 Angetyongpang A/c NPP Candidate declaration sentong nung Chakpa Medemsanger putu menden ajanga Shri. Tongpang Ozüküm NDPP candidate moatsüogo ta ashiba aija Chakpa Medemsanger putu menden tai ta nangzükdaksübaji Chakpa lanuri meinyak aser memetet.
2. Political party tangatetba aser tejangraba nung nijai senso lanur yimkong tenüng amshiba Chakpa lanurtemi kukua aitsür.
3. Senso lanur senden mena bangzüng masüba nung kijai Chakpa lanur tenüng amshiba asoshi Chakpa Medemsanger putu menden dangi tapet mera agitsü asoshi Chakpa lanur nisung 132-i mepishia iba sangdong ajanga abener.

Sd/-
Aomeren Chang
Chakpa

Sd/-
Mr. Takowati Jamir
Chakpa

SANGDONGER

Yangi Chungtia yimden ajanga osang ka yamai sangdonger. 10th November, 2015 nung koba Chungtia yimden-i Yimjenkimong aser Changtongya na ken-o telemetba nung ajemdaker NSCN/GPRN den teka amtep malitsü ta liasü. Ibaji yimden-isa meyipa agir aser aki ama teka amteper aotsü 9th February 2023 anogo lemetetba metetdaksür.

Sd/-
N.Bendang
Council Chairman Chungtia.

Belarus aser Poland na tsüingda mangatettep adok

Minsk, Tsüklai/February 18 (Agencies): Moscow tembar Belarus-i Hokolbarnü ashiba agi, par linük nung Poland nung tata garitem senzüsponng azioktsü aser Warsaw-i arrtsü nung crossing ka shibangtsü telemetba agiba sülen liaison officer ka mintokba sangdongogo.

Minsk nung foreign ministry-i, Poland ketdangsür jaok aser Warsaw-i Belarus den tang arrtsü nung crossing asem aliba rongnung ka shibangtsü telemetba agiba aitsüba den iba ya meimchir dak mebeshitsüba yimyaka aser pei ajung asa inyakba inyakyim ka lir, ta ashi. Iba dak sendakba nung Poland nung khu abenba tata garitem linük ana arok arrtsü indang crossing nung dang ila atokli ta sütetsü aser Lithuania aser Latvia adena Belarus-i aitba lenmangtem mamshitetsü.

"Parnok indang carrier tem inyaksangshi nung tetsükdaksü adokba ya jenjang agirtem tai lir aser aji Poland sorkar lir," ta ministry sangdong ka ajanga metetdaksü.

Minsk-isa, parnoki Polish Bialystok nung Belarus indang consulate staff tem den kasa Grodno nung Poland indang consulate staff tem kümtsütsü ta shiogo. Iba tetezü tarutsü nung diplomats tem mintoktsü.

"Belarus-isa, linük nung Polish Border Guard atema liaison officer ka kecha nüngdak mali ta bilemer," ta ministry-i ashi.

Kasa mapang nung Poland

Interior Minister Mariusz Kaminski-i, "Belarus nung ketdangsürtemi sangdongba ama tenokdangba agütsüra Poland-iba Belarus nung indang carrier tem nem tenokdangba agütsütsü," ta tweet asü.

Kidanger linük ana tsüingda mangatettep tali akümba mapang ka nung Poland-i taoba hopta, "state security" dak sendakba nung Bobrowniki arrtsü nung checkpoint shibanger ta sangdonga liasü.

Belarus nung okadak kati Polish-Belarusian osangbener Andrzej Poczobut-i sorkar anema nokdakba atema küm ti tepuokdak ayutsü asoshi obendang agütsüba sülen anogo ka lir iba telemetba agia liasü.

Tir Alexander Lukashenko-i, Brestibarnü bendanger press den senden ka ayongzüka menogo. Iba senden nung AFP-i Poczobut indang ken o aser lenir anema nokdakertem tepuokdak yua alirtem indang asüingdang liasü.

"Na aibelena lira tepuokdaki yoktsü," ta pai langzüba den par linük nung yimden yimsütsüba dak ajemdaker tepuokdaki yokertem mali ta ashi.

Lukashenko-i, 2020 küm pa yimsütsüba anema longkak aiterem tashiyim agi aziöka liasü.

Belarus ya Russia den kanga junga sendaktepa lir aser Ukraine amaktsü atema Belarus indang litsü amshitsü atema Moacow indang sepaitem nem temelaba agütsür lir.

Christian Atsu indang tasü mang ngutetogo



Christian Atsu (File photo)

Tsüklai/February 18, 2023 (Agencies): Turkey nung menoknok tesashi anokba sülen taoba Ghana nung international asayar Christian Atsu tasü mang ngutetogo, ta local media-i Honibarnü sangdongba pa indang manager-i metetdakja liasü.

February 6 nü 7.8-magnitude tesashi menoknok ka agi Turkey aser Syria na anokshitsüba mapang arishi küm 31 tain Atsu-a Turkey nung liasü. Iba menonok anokba sülen linük anaprongla senteper nisung 43,000 dak tema süogo.

Mezüngbo pa menoknok anokba sülen anogo ka lir

ngutetogo ta sangdonga liasü, ajisüaka iba osang ya tai liasü. Turkey nung pa indang manager Murat Uzunmehmet-i DHA news agency dang Honibarnü ashiba agi, pa indang tasü mang Hatay province nung jana agi anenbanger lia ngutetogo.

"Atsu indang tasü mang jana nung ngutetogo," ta Murat Uzunmehmet-i Hatay nung osangbenertem dang ashi. "Tang pa indang oset aika agitetdar aser pa indang phone-a nguogo," ta pai ashi.

Ghana indang ministry of foreign affairs-ia osang tamajung angazükba

metetdaksüogo.

"Christian Atsu tasü mang ngutetba mapa teti aser pa jakrep aser Ghana embassy nungi ketdangsurtem iba tesem nung liasü," ta ministry-i ashi.

Ghana-isa, pa tasü mang aremtsü atema linüki bener aotsü asoshi Turkey sorkar den inyaksangshidar, ta ashi

Midfielder Atsu ya Chelsea nungi season pezü asayaba sülen 2017 küm Newcastle-i ao. Pa September ita Turkish Super Lig club Hatayspor nungi asayatsü atema tenangzüktepba yanglua liasü.

Teküzmükertemi Atsu indang tasü mang ya pa liya aliba Ronessans Residence nung nguteta liasü. Pa Hatay kübok Antakya yimti nung lia liasü aser pa aliba ki chirepba sülen pa süogo.

Turkey police-i iba ki yangluba contractor taoba hopta Istanbul airport nung puogo. Pa Montenegro-i oya aliba mapang apu, ta state news agency Anadolu-i metetdaksü.

Menoknok manok tsü ngda Atsu ya southern Turkey-i aotsü liasü, saka Hatayspor indang manager-i Hokolbarnü ashiba agi, pai club den dang anenzüka atatsü atema telemtetba agia liasü.

Barcelona-i LA Galaxy nungi Defender Julian Araujo alizükogo

Tsüklai/February 18, 2023 (Agencies): Barcelona-i MLS club LA Galaxy nungi Mexico nung defender Julian Araujo alizükogo. Pa Barca nungi 2026 küm tashi asayatsü ta club anapronglai metetdaksüogo.

Barcelona puri transfer window tatembangbuba anogo second 18 agi menoba ajanga Araujo malizüktem aser parnoki iba asayar ya zü ngoksemtsü atema Court of Arbitration for Sport (CAS) dang mepeshitsü ta ashi.

Araujo-i küm asem ser tesadang atema tenangzüktepba ka yangluogo aser pa club nungi 2025-26 season tatembang tashi asayatsü, ta Barcelona-i ashiba den arishi küm 21 tain asayar ya club indang B team nung adentsü ta ashi.

Araujo, shiba 2019 küm March ita LA Galaxy nung aden, pai iba club nungi tetoktepba ajak nung asaya 108 nung asayaba mapang goal ina idaktsüogo aser assist 20 süja liasü.

Barcelona-i iba ita tetenzüklen ashiba agi, parnoki Araujo alizüktsü merang ajisüaka technical tsütsü timtem kar adokba ajanga winter market deadline ya second 18 agi memenepe liasü.

Iba mapang Barcelona indang director of soccer, Mateu Alemany-i, asayar ya alizüktsü akoktsü makoktsü iba indang



Julian Araujo

FIFA den sensaksem dar ta ashi. Court of Arbitration for Sport nem temepeshiba ka agütsüba sülen Barcelona puri iba tenangzüktepba yanglutetogo.

Barcelona-i ashiba agi, Araujo-i season nung tanungba asayatem aser iba den bendenloksema ano season asem asayatsü mulunga agizükogo. Araujo ya tanga club ka dang yokra Galaxy-i transfer fee sell-on percentage agizüktsü.

Araujo ya LA Galaxy indang academy program nungi anitetba asayar ka lir aser pa MLS nung season pezü asayaogo. Pa LA nungi regular-season appearances 100 nungi 89 nungbo tetenzük nungi asayaogo aser All-Star selection

nunga anabenbo densemogo.

Araujo taoba season asaya 39 nung asayaogo aser asaya 35 bo tetenzük nungi asaya liasü. Pai goal ka idaktsü aser assist 9 süja liasü.

Kasa mapang nung Araujo Mexico team nungia asem benbo asayaogo.

Pa California nung aso aser United States aser Mexico naprongla nungi asayatsü temsüa lir. US youth team nungi asayaba sülen 2020 küm El Salvador den asayaba mapang senior team nungi asaya liasü.

2021 küm pai FIFA dang Mexico nungi asayatsü atema temelaba meshia liasü aser December ita Chile den friendly asayaba mapang Mexico team nungi mezü ngbuba asaya liasü.

Asia Championships: India Semifinals-i iogo

Tsüklai/February 18, 2023 (Agencies): Hokolbarnü Asia Mixed Team Badminton Championships quarterfinals asaya nung India team-i 3-2 agi Hong Kong madak takok ngua semifinal-i iogo aser tang mezü ngbuba iba asayamung nung medal ka angutsü jangjaogo.

Asaya 0-2 agi mekoki aliba mapang tarep asayar Dhruv Kapila o Chirag Shetty na aser PV Sindhu nungeri pei tata asaya koka score 2-2 aküm.

Team ana tsü ngda quarterfinals asaya nung mezü ngbuba tarep temeyoktep asaya aser India nungeri tarep Ishaan Bhatnagar aser Tanisha Crasto nati kanga meranga asaya ajisüaka 24-26 17-21 agi Lee Chun Hei Reginald aser Tsz Yau NG na mekoki Hong Kong 1-0 agi tejakdang aküm. Tanabuba asaya nung

World No. 11 aser Commonwealth Games champion Lakshya Sen-i 22-20 19-21 18-21 agi world No. 14 asayar Ka Long Angus NG makok. Tena tsü ngda ghonda ka ser minute 10 asaya liasü.

Iba sülen tebur tarep asaya nung Kapila aser Shetty nati India atema asaya ka koktsü. Tenati 20-22 21-16 21-11 agi Tang Chun Man aser Yeung Shing Choi na madak takok ngua liasü.

Tetsür kija asaya nung Olympic nung medal ana tashi ngur aliba asayar Sindhu-i, 16-21 21-7 21-9 agi Saloni Samirbhai Mehta madak takok ngua score 2-2 aküm.

Decider asayaba mapang tetsür tarep asaya nung Treasa Jolly aser Gayatri Gopichand nati Tsz Yau NG aser Wing Yung NG na 21-13 21-12 agi koka India team-i iba asaya koka liasü.

WPL 2023: Smriti Mandhana lenisüba nung RCB asayatsü

New Delhi, Tsüklai/February 18 (Agencies): Imla aliba ama India vice-captain Smriti Mandhana, Women's Premier League (WPL) mezü ngbuba atema Royal Challengers Bangalore (RCB) team captain asütsü shimogo.

Tawa Mumbai nung auction agiba mapang RCB-i sen crore 3.40 agi Smriti alizükogo. WPL auction nung la sen timtiba agi alizüka liasü.

Iba osang ya franchise indang social media handles nung lemsatepba video ka ajanga sangdonga liasü. Smriti captain shimba osang dak sendakba nung RCB nungi Virat Kohli aser tebur team captain Faf du Plessis natia osang lemsatepogo.

"Ano No. 18 asayar kati WPL nung RCB team anitsü. Hau Smriti Mandhana indang jembirba. Na team tajungtiba aser alima nung fan tajungtiba temi nongita yaritsü," ta Kohli-i ashi.

Mandhana captain asütsü shimba indang jembiba mapang RCB mendenbuba Prathmesh Mishra-i, "Smriti ya onok sentong nung teyongtsü lir. Onoki la nem team anitsü atema shilem agitsüogo aser Smriti-i RCB team temaba jenjangi anitsü ta temulung lema bilemer," ta ashi.

RCB tetsür team captain mapa agizükba dak sendakba nung Mandhana-i, "Virat aser Faf nati RCB lenisüba indang jembiba ngua kanga pelar aser iba maongka tajung kü nem agütsüba atema RCB management dang kanga pelaba lemsateper.

"Fan tem nungi temeim agizüktsü yongya atar, shirnok alima nung tajungtibatem ta kü dang shiogo. WPL nung RCB pur takok dangi anitsü atema ni



Smriti Mandhana

noklang nung noklang bendanga agüja inyaktsü nangzükter," ta lai ashi.

Opener ama lai WT20I asaya 113 nung run 2661 yanglua lir. La indang average 27.15 aser strike-rate 123.19 lir.

T20 asaya nung Mandhana-i ya ajaki aginüba asayar ka lir aser la Brisbane Heat, Sydney Thunder (Women's BBL), Western Storm (Kia Super League) aser Southern Brave (The Hundred) nungi asayaogo.

La lenisüba nung India team T20I asaya 11 asayaogo aser asaya trokbo kokogo. Women's T20 Challenge season pezü prongla nung nung la Trailblazers indang captain liasü aser 2020 küm la lenisüba nung lar team-i iba asayamung koka liasü.

2021 küm asaya 22 nung run 855 yangluba sülen Smriti-i tawa ICC Women Cricketer Of The Year naroküm agizükogo.

WPL ya March 4 nü tenzüktsü aser mezü ngbuba asaya Gujarat Giants aser Mumbai Indians na asayatsü. RCB pur mezü ngbuba asaya March 5 nü Delhi Capitals den asayatsü.

BILEMDANGANG

"Tai nangzüktsü tasak saka aji agi nisung sünepdaktsür."